



Prishtinë: 10.05.2017

Kodi i ZRRE-së: V_922_2017

Bordi i Zyrës së Rregullatorit për Energji

Duke u bazuar në:

- Nenin 9, paragrafi 1, nën-paragrafi 1.7, nenin 15 dhe 17 të Ligjit për Rregullatorin e Energjisë (Nr. 05/L-084);
- Nenin 17 dhe 18 të Rregullës për Zgjidhjen e Ankesave dhe Kontesteve në Sektorin e Energjisë;
- Vendimi i DMK-së të ZRRE-së: **ZRRE/DMK_V_1560_03_17**; dhe
- Ankesa e KESCO-së e datës **25.04.2017**.

në seancën e mbajtur më datë 10.05.2017, nxori këtë:

V E N D I M

- I **REFUZOHET** ankesa e KESCO-së ndaj vendimit të DMK-së për konsumatorin I. A. nga fshati Pleshinë, Komuna e Ferizajt, me shifër të konsumatorit **DFE – 131184** si e pa bazuar.
- II **MBETET në fuqi** vendimi i Departamentit për Mbrojtjen e Konsumatorëve nr. ZRRE/DMK_V_1559_02_17 i datës 21.03.2017.

A r s y e t i m

Zyra e Rregullatorit për Energji me datë 25.04.2017 ka pranuar ankesën e parashtruar nga përfaqësuesi i autorizuar i KESCO-së, i cili ka kundërshtuar vendimin e Departamentit për Mbrojtjen e Konsumatorëve në ZRRE si vendim i shkallës së parë për këto shkaqe: Përfaqësuesi i KESCO-së, në ankesë ka theksuar se korrigjimi i datës 16.08.2015 është në përputhshmëri të plotë me rregullat në fuqi, pasi që energjia e harxhuar nga konsumatori nuk është regjistruar e tëra në njehsorin elektrik, por vetëm 33.33% e saj si pasojë e djegies së dy nga 3 sistemet matëse, atëherë pjesa e mbetur e energjisë së harxhuar por e paregjistruar në njehsor elektrik prej (66.66%) përmirësohet përmes korrigjimit të faturave për 6 muajt e fundit bazuar në Kodin e matjes së OSSH-së neni 4.11.1. Në ankesë theksohet se pasaktësia në matje nuk është trajtuar si shfrytëzim i paautorizuar nga KESCO. KESCO gjithashtu thekson se ZRRE vendimin e saj e mbështet në rrjedhën e energjisë elektrike aktive me njehsorin e ri me këtë theksohet se një gjë e tillë është e mundur por që nuk është relevante për faktin se konsumatori ka mundësi të ndërrimit apo zëvendësimit të pajisjeve matëse shtëpiake e cila do të ndikonte në zvogëlimin e shpenzimit të energjisë elektrike, po ashtu është edhe një tendencë e konsumatorëve se me ndërrimin e njehsorëve nga analog në njehsor digjital, konsumi i energjisë është me i vogël.

Bazuar në këtë KESCO kërkon nga Bordi që të pezulloi vendimin e DMK/ZRRE _V_1559_02_17, në lidhje me shifrën DFE 131184 si të pabazuar.



Bordi i Zyrës së Rregullatorit për Energji në mbledhjen e mbajtur me datë 10.05.2017 ka analizuar të gjitha shkresat e lëndës të prezantuara nga palët në kontest si dhe vendimin e Departamentit për Mbrojtjen e Konsumatorëve dhe pas kësaj ka vërtetuar se vendimi i DMK-së si vendim i shkallës së parë është vendim i drejtë dhe i bazuar në prova konkrete.

Lidhur me pretendimet e përfaqësuesit të KESCO-së, se korrigjimi i datës 04.06.2015 është në përputhshmëri me dispozita ligjore të përcaktuara me nenin 4.11.1 të Kodit të Matjes së OSSH-së, për Bordin pretendimet të tilla janë vlerësuar si të paqëndrueshme për faktin se nga analiza e bërë rrjedhës së energjisë elektrike konsumatori përkundër kësaj ka rënie të shpenzimit të energjisë elektrike në raport me atë që pretendon përfaqësuesi i KESCO-së në ankesën e tij.

Bazuar në analizën e përgjithshme të energjisë elektrike me njehsorin e vjetër elektrik (kontestues), si dhe njehsorin e ri elektrik konstatohet se konsumatori ka lexim dhe faturim të rregullt të shpenzimeve mujore. Sipas analizës së rrjedhës së energjisë elektrike për periudhat kontestuese me njehsorin e vjetër elektrik **nr. 17668048** dhe njehsorin e ri elektrik **nr. 16075168** për periudha të njëjta kohore, DMK konstaton se nuk ka mos përputhje të shpenzimeve të energjisë elektrike, përkatësisht me njehsorin e vjetër **nr. 17668048** ka shpenzime me të larta. Sipas rrjedhës së energjisë elektrike mesatarja mujore e shpenzimeve të energjisë elektrike me njehsorin elektrik **nr. 17668048** për periudhën 07/2013 deri në periudhën 06/2014 është **718 kWh/muaj**, për periudhën 07/2014 deri në periudhën 06/2015 është **699 kWh/muaj**, kurse me njehsorin e ri elektrik nr. 16075168 periudha 07/2015 deri në periudhën 06/2016 është **656 kWh/muaj**.

Me qëllim të vërtetimit sa më të saktë të shpenzimit të energjisë elektrike të konsumatorit, si dhe mundësisë së matjes jo të saktë të njehsorit elektrik **nr. 17668048** Bordi ka bërë edhe krahasimet me njehsorin elektrik **nr. 30514792** ku konstatohet se mesatarja mujore nga periudha 08/2016 deri në periudhën 02/2017 është **458 kWh/muaj**. Bazuar në të gjitha analizat e bëra për shpenzimet mujore të energjisë elektrike me njehsorin e vjetër (kontestues) **nr. 17668048**, **njehsorin nr. 16075168** si dhe **njehsorin elektrik nr. 30514792**.

Bordi i ZRRE-së nuk ka gjetur asnjë element me të cilin mund të vërtetohet se njehsori elektrik **nr.17668048** nuk ka bërë matje të saktë për periudhat të cilat ngarkohet me korrigjim prej 66% pasi që kjo nuk reflekton gjendjen reale të konsumit të përgjithshëm të konsumatorit pasi në dy krahasimet e para të bëra me njehsorin kontestues dhe njehsorin **nr. 16075168** konsumatori ka pasur shpenzim me të lartë prej **10%** dhe **7%**, kurse krahasimi në mes shpenzimeve të regjistruara me njehsorin **nr. 16075168** dhe **nr. 30514792** ka rënie prej **47%**.

Sipas nenit 5 paragrafi 1 nën paragrafi 1.5 të Rregullës për kushtet e përgjithshme të furnizimit me energji theksohet: "konsumatorët kanë obligimin që të paguajnë për energjinë e shfrytëzuar, sipas kontratës për Furnizim me Energji të lidhur me Furnizuesin e Energjisë, si dhe për tarifën për shfrytëzim të sistemit të miratuara nga ZRRE-ja". Bazuar në këtë dispozitë ligjore është konstatuar se në rastin konkret konsumatori ka obligim që të paguaj për atë që ka shpenzuar, por që jo të ngarkohet pa bazë për rastet që kanë probleme teknike në njehsorin elektrik.

Bordi i ZRRE, gjithashtu ka konstatuar se përfaqësuesi i autorizuar i KESCO-së në ankesën e tij nuk ka ofruar asnjë provë bindëse për të vërtetuar faktin se vendimi i DMK-së si organ i shkallës së parë nuk është vendim i drejtë dhe i bazuar në ligje dhe rregulla, por që i njëjti në ankesë vetëm se ka kontestuar vendimin e shkallës së parë në mënyrë të përgjithësuar pa ofruar prova të arsyeshme.

Bordi i ZRRE-së në mbledhjen e mbajtur me datë 10.05.2017 pas analizimit të krejt asaj që u theksua më lartë, ka vendosur si në dispozitivin e këtij vendimi.

III. Vendimi nxirret në gjuhët zyrtare në Republikën e Kosovës.



- IV.** Vendimi hyn në fuqi në datën e miratimit nga Bordi i ZRRE-së, dhe do të publikohet në faqen elektronike zyrtare të ZRRE-së.

Këshillë Juridike: Pala e pakënaqur me këtë Vendim mund të iniciojë konflikt administrativ në Gjykatën Kompetente, brenda tridhjetë (30) ditëve nga data e pranimin të Vendimit ose data e publikimit të tij në faqen elektronike të ZRRE-së, cilado që ndodhë e fundit.

Bordi i ZRRE-së:

Krenar Bujupi, u.d. kryesues

Arsim Janova, anëtar

Besim Sejfiqaj, anëtar

Vendimi iu dërgohet:

- KESCO-së, dhe
- Konsumatorit I. A. dhe,
- Arkivit të ZRRE-së